

族谱书法议

谱而大书名为纲细注字为目妻若子属焉忠臣孝子贤母节妇必书所以立人极扶天常也年满八十必书纪寿也积学未售必书伤穷也敏学早世必书惜才也男没王事必书录贤也客死他乡必书悯不归也文学行谊必书人才不易得也好善乐施必书于人必有所济也修举族中公事者必书录功也著述必书为其苦心立学发前人所未发而可以教后世也科名禄位必书扬名显亲也诰敕封赠必书宠锡光荣也纳粟奏名必书重名器也其尚存虽美行不书盖棺而后论定也生某年卒某年必书人之始终也葬地必书不可不识也子孙从祖父曰附妻从夫曰合附合必详左右远近懼后人不知也生日娶死日妣有继室曰元配重适体也曰继室曰侧室分贵贱也所生子女各属焉夫死而再嫁者有子书某子于夫葬后曰子某母某氏义已绝于夫而犹母云者天下无无母之人也无子书曰已娶嫌未婚也娶妻曰某人之女明所自出也女嫁曰归某人明有家也娶再醮之妇曰娶某妇曰妇云也明非女也女再嫁

也前婚从一而终再嫁非女家可得主也无子抚子曰某兄弟子为后出为人后者曰出自伯叔某为后兴灭继绝之义也抚异姓不书乱宗也抚同姓而昭穆不相当者斥归本宗懼乱伦也出为异姓子必书冀其归也即为僧道亦书望其返也远徙外省者必详书其人虽不返或其子不多忘本得有所据而归也丁巳以前不尽以书法追改者世远无征疑以传疑也凡此皆天理人情之可以感发人心可以惩创人志庶几有补于家教之万一云